



Broj/Број: 01/2a-50-1-2-9/07
Sarajevo/Сарајево, 03.07.2007.

ZAPISNIK

9. sjednice Komisije za vanjske poslove Zastupničkog doma Parlamentarne skupštine Bosne i Hercegovine, održane 03.07.2007. godine

Sjednica je počela u 9 sati i vodio ju je predsjednik Komisije Slavko Matić. Sjednici su prisustvovali sljedeći članovi Komisije: Slavko Matić, Milica Marković, Sadik Ahmetović, Sefer Halilović, Azra Alajbegović, Husein Nanić, Milorad Živković te Davorin Semenik – privremeni sekretar Komisije.

Odsutni su bili Denis Bećirović i Azra Hadžiahmetović.

Sjednici su prisustvovali i pozvani gosti i predstavnici predlagača: Džalila Zeko ispred Ministarstva pravde BiH, Enisa Babić ispred Ministarstva transporta i komunikacija BiH i Svestislav Krnić ispred Ministarstva finansija i trezora BiH.

Odsutan je bio izvjestilac i predstavnik Ministarstva za civilne poslove BiH.

Zapisnik su vodili studenti - stažisti Isović Lejla i Mirjana Brčkalo.

Predsjednik Komisije je najprije otvorio raspravu o dnevnom redu i predložio da se prihvati sugestija Kolegija Zastupničkog doma Parlamentarne skupštine BiH da se u dnevni red uvrsti Kreditni sporazum između Bosne i Hercegovine koju zastupa Ministarstvo finansija i trezora i Bank Austria Creditanstalt AG - *Projekat vodovodnog i kanizacionog sistema u opštini Gradiška*.

Za riječ se javio gospodin Milorad Živković i istakao da je navedeni sporazum iste prirode kao i Kreditni sporazum između BiH, koju zastupa Ministarstvo finansija i trezora BiH, i Bank Austrija Creditanstalt Ag-*Projekat vodosnadbijevanja Brčko Distrikta*, te da ne postoji prepreka da se i ovaj sporazum stavi na dnevni red Komisije.

Potom se za riječ javila gospođa Milica Marković i postavila pitanje Sporazuma između BiH i Srpske pravoslavne crkve. Predložila je da se Komisija obrati Predsjedništvu BiH povodom ovog sporazuma s obzirom da još uvijek nije uvršten na dnevni red.

Nakon toga je izvjestilac iz Ministarstva za ljudska prava i izbjeglice BiH predložio sa se skine sa dnevnog reda Evropska povelja o manjinskim ili regionalnim jezicima. Ovaj prijedlog je prihvaćen, uz nalog da odmah dostave ovoj Komisiji i zastupnicima Zastupničkog doma Parlamentarne skupštine BiH pisano obrazloženje o razlozima povlačenja ovog dokumenta iz procedure davanja suglasnosti za ratifikaciju.

Potom je predsjednik Komisije predložio sljedeći

DNEVNI RED

- 1) Verificiranje Zapisnika 8. sjednice Komisije za vanjske poslove Zastupničkog doma Parlamentarne skupštine Bosne i Hercegovine, održane 11.06.2007.godine;
- 2) Davanje suglasnosti za ratificiranje Drugog dodatnog protokola uz Evropsku konvenciju o pravnoj pomoći (Predlagatelj: Ministarstvo pravde BiH);

- 3) Davanje suglasnosti za ratificiranje Sporazuma između Bosne i Hercegovine i Ujedinjenih Arapskih Emirata o izbjegavanju dvostrukog oporezivanja u odnosu na poreze na dohodak i imovinu (Predlagatelj: Ministarstvo finansija i trezora BiH);
- 4) Davanje suglasnosti za ratificiranje Kreditnog sporazuma između BiH, koju zastupa Ministarstvo finansija i trezora i Bank Austrija Creditanstalt Ag-*Projekat vodosnadbijevanja Brčko Distrikta* (Predlagatelj: Ministarstvo finansija i trezora BiH);
- 5) Davanje suglasnosti za ratificiranje Kreditnog sporazuma između Bosne i Hercegovine i OPEC Fonda za međunarodni razvoj - *Projekat sarajevske zaobilaznice* (Predlagatelj: Ministarstvo finansija i trezora BiH);
- 6) Davanje suglasnosti za ratificiranje Ugovora o socijalnom osiguranju između Bosne i Hercegovine i Kraljevine Belgije (Predlagatelj: Ministarstvo civilnih poslova BiH);
Davanje suglasnosti za ratificiranje Ugovora o pomorstvu između Vijeća ministara BiH i Vlade Republike Turske (Predlagatelj: Ministarstvo transporta BiH);
- 7) Zabilješka sa sastanka predsjednika Komisije za vanjske poslove, Slavka Matića, održanog 11.06.2007. godine sa generalnim direktorom Odjela za Centralnu i Zapadnu Evropu MVP-a Islamske Republike Iran, Ali Bagheri-em;
- 8) Izvještaj o zvaničnoj uzvratnoj posjeti predsjednika Islamske Republike Pakistan, generala Perveza Musharrafa Bosni i Hercegovini (Materijal Ministarstva vanjskih poslova BiH);
- 9) Neumska deklaracija usvojena na 6. konferenciji predsjednika parlamenata Jadransko-jonske inicijative, održanoj u Neumu, 17.maja 2007.g (Materijal Sektora za međunarodne odnose i protokol PSBiH);
- 10) Izvještaj sa sastanka Općeg komiteta za ekonomske poslove Parlamentarne skupštine Centralnoevropske inicijative održanog u Minsku, 5. do 7. juna 2007 (Materijal delegacije PS BiH u PD CEI);
- 11) Zabilješka o razgovoru ambasadora BiH u Republici Srbiji, Tomislava Leke, sa novoizabranim predsjednikom Skupštine Srbije, Oliverom Dulićem (Materijal Ministarstva vanjskih poslova BiH);
- 12) Kreditnog sporazuma između BiH koju zastupa Ministarstvo finansija i trezora i Bank Austria Kreditanstalt AG - *Projekat vodovodnog i kanalizacijskog sistema u opštini Gradiška*
- 13) Tekuća pitanja;

Dnevni red je jednoglasno usvijen.

Ad.-1. Verificiranje Zapisnika 8. sjednice Komisije za vanjske poslove

Nije bilo rasprave i primjedbi i zapisnik je jednoglasno prihvaćen.

Ad.-2. Davanje suglasnosti za ratificiranje Drugog dodatnog protokola uz Evropsku konvenciju o pravnoj pomoći (Predlagatelj: Ministarstvo pravde BiH);

Predsjednik Komisije g. Matić je dao riječ izvjestiocu iz nadležnog ministarstva da da uvodno izlaganje povodom ovog sporazuma.

Izvjestiteljica iz Ministarstva pravde BiH Džalila Zeko obratila se prisutnim članovima Komisije. Istakla je da je Bosna i Hercegovina članica i Prvog i Drugog Protokola uz Evropsku konvenciju o pravnoj pomoći. Pravni osnov za donošenje ove Konvencije je Ustav BiH. Prema njenim navodima ova Konvencija bi trebala da olakša međunarodnu pravnu pomoć između država. Istakla je, da ukoliko dođe do ratifikacije Drugog dodatnog protokola uz Evropsku konvenciju o pravnoj pomoći, morat će se pristupiti izmjeni niza zakona. Naglasila je, međutim, da su bilateralni sporazumi uvijek iznad ovih Protokola, odnosno da odredbe ovog Protokola ne diraju u detaljnije odredbe bilateralnih ili multilateralnih ugovora, između strana ugovornica. Sporazumi se primjenjuju u cjelosti, a rezerve su moguće samo na 5 članova i to članove 16, 17, 18, 19 ili 20.

Druge rezerve se ne mogu izraziti. Naglašava da su 33 zemlje prihvatile Sporazum, a 12 od njih je pristupilo ratifikaciji.

G. Živković je postavio pitanje, da li su na snazi ovi sporazumi u BiH, iako se još uvijek nije pristupilo njihovoj ratifikaciji, te da li su susjedne zemlje Srbija i Crna Gora ratificirale Drugi dodatni Protokol uz Evropsku konvenciju o pravnoj pomoći. Osvrnuo se i na grešku u samom sporazumu u kojem datum donošenja nije tačno naveden, što je izjaviteljica potvrdila.

Potom je predsjednik predložio da se da suglasnost za ratificiranje ove Konvencije. Pet članova je bilo za, dok su Živković i Marković bili suzdržani.

Ad.-3. Davanje suglasnosti za ratificiranje Sporazuma između Bosne i Hercegovine i Ujedinjenih Arapskih Emirata o izbjegavanju dvostrukog oporezivanja u odnosu na poreze na dohodak i imovinu (Predlagatelj: Ministarstvo finansija i trezora BiH);

Predsjednik Komisije je na početku rasprave dao riječ izjavitelju iz Ministarstva finansija i trezora BiH, Svetislavu Kruniću.

Izjavitelj je istakao da se radi o sporazumu tipskog karaktera i dodao da je Vijeće ministara BiH formiralo posebno tijelo koje se bavi ovim pitanjima. Isto tako je naglasio da se ovaj sporazum primjenjuje na poreze na dohodak i na imovinu, koji se zavode u ime države ugovornice ili njenih političkih jedinica ili lokalnih vlasti, neovisno od načina naplate. Dodao je da su uslovi za ratificiranje ispunjeni te smatra da bi se trebala dati saglasnost za ratificiranje. G. Matić je predložio da se da suglasnost za ratificiranje s obzirom da se radi o tipskom ugovoru. Šest članova je bilo za, a jedan suzdržan - Husein Nanić.

Ad.-4. Davanje suglasnosti za ratificiranje Kreditnog sporazuma između BiH, koju zastupa Ministarstvo finansija i trezora i Bank Austrija Creditanstalt Ag-Projekat vodosnadbijevanja Brčko Distrikta (Predlagatelj: Ministarstvo finansija i trezora BiH);

Izjavitelj je naveo da je Sporazum sa Austrijom potpisan 2006.godine. Vrijednost projekta iznosi ca. 4 miliona, dok kamatna stopa iznosi 0%. Predviđeni rok je juli ove godine. Stav je nadležnog ministarstva da ovaj Sporazum bude odobren.

Za riječ se javio gospodin Sefer Halilović je istakao kako je protiv svakog oblika zaduživanja Bosne i Hercegovine jer smatra da će problem nastati onda kada se bude morao vratiti kredit.

Gospodin Husein Nanić je istako kako bi Komisija trebala posebno dobijati informacije i podatke o zaduženosti BiH, odnosno o njenim ugovornim obavezama.

Izjavitelj je na ovo odgovorio da informacije o spoljnom dugu BiH postoje, te da su dostupne Parlamentarnoj skupštini BiH. Naime, precizira da su polugodišnji i godišnji izvještaji redovni, a da informacija o trenutnoj zaduženosti BiH može biti dostavljena u skorije vrijeme. Naveo je da trenutni spoljni dug BiH iznosi 4 milijarde, a isto tako podsjetio da BiH spada u umjereno zadužene zemlje. Dodao da je ovaj projekat ocijenjen kao prihvatljiv, te da je predmet stimulativnog režima. Za vraćanje ovog kredita bit će zadužen Brčko Distrikt.

Gospodin Nanić se osvrnuo na potrebu uravnoteženog razvoja BiH. Smatra da neka područja u BiH zaostaju u razvoju u odnosu na druga.

Gospodin Matić je nakon toga preuzeo riječ i predložio da Komisija da suglasnost za ratificiranje. 6 članova je bilo za, a 1 suzdržan –g. Sefer Halilović.

Ad.-5. Davanje suglasnosti za ratificiranje Kreditnog sporazuma između Bosne i Hercegovine i OPEC Fonda za međunarodni razvoj - Projekat sarajevske zaobilaznice (Predlagatelj: Ministarstvo finansija i trezora BiH);

Izvjestilac iz Ministarstva finansija i trezora BiH naveo je da se Sarajevska zaobilaznica nalazi na liniji Koridora 5C. Ovaj sporazum je potpisan 2005.godine. Vrijednost projekta iznositi će 18 miliona američkih dolara, te da je to samo dio sredstava koji će se koristiti za finansiranje ovog projekata. Na pitanje gospodina Halilovića, koliki se kredit morao dići za ovakav jedan projekat, odgovor izvjestioca je bio 35 miliona američkih dolara.

Gospođa Azra Alajbegović se također osvrnula na ukupnu vrijednost projekta te istakla da bi to značilo 7 miliona po kilometru sarajevske zaobilaznice.

Izvjestilac je napomenuo kako su procjenu vršile međunarodne institucije te da ih smatra tačnim.

Gospodin Živković je postavio pitanje zašto se ovaj Sporazum držao dvije godine u Ministarstvu s obzirom da je sporazum potpisan 2005 godine. Naglasio je da su radovi sada dosta skuplji te da cijene rastu iz godine u godinu. Izvjestitelj je odgovorio na njegovo pitanje i dodao da su razlozi uglavnom administrativne prirode. Gospodin Halilović je, također, dodao da je nemoguće što ovakav Sporazum čeka dvije godine. Gospođa Alajbegović je naglasila da je neophodno od nadležnog ministarstva zahtijevati zvaničan izvještaj o razlozima administrativne inertnosti. Smatra da to nije glavni razlog, već da se radi o nekim drugim okolnostima.

Predsjednik Komisije je predložio članovima da se da suglasnost za ratificiranje. Gospodin Sefer Halilović je bio suzdržan dok su ostali članovi bili za.

Ad.-6. Davanje suglasnosti za ratificiranje Ugovora o socijalnom osiguranju između Bosne i Hercegovine i Kraljevine Belgije (Predlagatelj: Ministarstvo civilnih poslova BiH);

Ova tačka dnevnog reda nije razmatrana na sjednici Komisije zbog odsustva izvjestioca nadležnog ministarstva.

Ad.-7. Davanje suglasnosti za ratificiranje Ugovora o pomorstvu između Vijeća ministara BiH i Vlade Republike Turske (Predlagatelj: Ministarstvo transporta BiH);

Predsjedatelj Komisije za vanjske poslove je dao riječ, izvjestiocu iz Ministarstva komunikacija i transporta BiH, Enisi Babić, da da kratko izlaganje povodom ovog sporazuma. Gđa Babić istakla je da su Vijeće ministara Bosne i Hercegovine i Vlada Republike Turske voljni da doprinesu razvoju bilateralnih trgovinskih odnosa te da podstaknu i razvijaju odnose na polju pomorstva kao i da ojačaju saradnju na tom polju. Naglasila je da su osnovni ciljevi ovog ugovora unapređenje i razvijanje odnosa na polju pomorstva između ugovornih strana, jačanje sigurnosti plovidbe i zaštita od zagađenja mora, razmjena iskustava i stručnjaka na polju pomorstva, itd. Prema njenim navodima za provedbu ovog ugovora u Bosni i Hercegovini će biti nadležno Ministarstvo komunikacija i transporta BiH. Također, je dodala da odredbe ovog ugovora ne utiču na prava i obaveze ugovornih strana koje proizilaze iz međunarodnih konvencija i ugovora.

Predsjednik Komisije je predložio da se da saglasnost za ratificiranje ovog sporazuma. Svi članovi su bili za.

Ad.-8. Davanje saglasnosti za ratificiranje Kreditnog sporazuma između BiH koju zastupa Ministarstvo finansija i trezora i Bank Austria Kreditanstalt AG - Projekat vodovodnog i kanalizacijskog sistema u opštini Gradiška

Na početku svog izlaganja izvjestilac iz Ministarstva finansija i trezora BiH je istakao da je ovaj sporazum isti kao i Projekat vodosnadbijevanja Brčko Distrikta, sa manjim razlikama. Također je naglasio kako je i ovaj sporazum potpisan 2006 godine. Kamata će se plaćati po stopi od 0.55%. Također je istakao da će Općina Gradiška biti zadužena za vraćanje kredita.

Predsjedatelj komisije je predložio da se da suglasnost za ratificiranje ovog sporazuma. Sefer Halilović je bio suzdržan, dok su ostali članovi bili za.

Ad.-9. Zabilješka sa sastanka predsjednika Komisije za vanjske poslove, Slavka Matića, održanog 11.06.2007. godine sa generalnim direktorom Odjela za Centralnu i Zapadnu Evropu MVP-a Islamske Republike Iran, Ali Bagheri-em;

Informacija je primljena na znanje bez rasprave

Ad.-10. Izvještaj o zvaničnoj uzvratnoj posjeti predsjednika Islamske Republike Pakistan, generala Perveza Musharrafa Bosni i Hercegovini (Materijal Ministarstva vanjskih poslova BiH);

Članovi Komisije su stavili primjedbu da u izvještaju nije navedeno da je Predsjednik Pakistana imao susrete i sa parlamentarcima pa je u tom smislu potrebno skrenuti pažnju autoru izvještaja.

Ad.-11. Neumska deklaracija usvojena na 6. konferenciji predsjednika parlamenata Jadransko-jonske inicijative, održanoj u Neumu, 17.maja 2007.g (Materijal Sektora za međunarodne odnose i protokol PSBiH);

Informacija je primljena na znanje bez rasprave.

Ad.-12. Izvještaj sa sastanka Općeg komiteta za ekonomske poslove Parlamentarne skupštine Centralnoevropske inicijative održanog u Minsku, 5. do 7. juna 2007 (Materijal delegacije PS BiH u PD CEI);

Informacija je primljena na znanje bez rasprave.

Ad.-13. Zabilješka o razgovoru ambasadora BiH u Republici Srbiji, Tomislava Leke, sa novoizabranim predsjednikom Skupštine Srbije, Oliverom Dulićem (Materijal Ministarstva vanjskih poslova BiH);

Informacija je primljena na znanje bez rasprave.

Ad.-14. Tekuća pitanja

U okviru ove tačke dnevnog reda doneseni su slijedeći zaključci:

1. Zbog uočene sporosti u proceduri ratifikacije međunarodnih sporazuma koja nepotrebno traje dugo, donesena je odluka o formiranju podkomisije za izradu prijedloga za izmjene i dopune Zakona o postupku zaključivanja i izvršavanja međunarodnih ugovora, u sljedećem sastavu: Slavko Matić, Azra Alajbegović i Milica Marković.
2. Da se zatraži informacija od Predsjedništva BiH kada će Sporazum između BiH i Srpske pravoslavne crkve biti uvršen na dnevni red i zašto to do sada nije učinjeno.

Sjednica je završila svoj rad u 11 sati.

PRIVREMENI SEKRETAR
KOMISIJE ZA VANJSKE POSLOVE
Davorin Semenik

PREDSJEDNIK
KOMISIJE ZA VANJSKE POSLOVE
Slavko Matić